

Conte du fô.

Gaston Lucy - Presse-Annonces -17 Novembre 1967.

I gn'avot in cöp, dins in viadje du la S'mwas, ène mājōn avu in djon.ne oume k'ére pu bièsse à loû tout seû ku tout l'viadja assan.ne.

On l'loumot djan, mês les djins du viadje lu loumint: Djan-Djibêtisse.

In djou, sa mère lî dit insi :

- Choûte bin c'èst k'dju vas t'dire, tu vas prinde nôs trwâs couchêts et t'îrès les wårder dins les tchamps, pisk'i sont dusbanés. Wåde-les bin, là, lal'lé èyusse k'i truv'ront à fougñî. Dj'ans co mwintes djous d'avant les frèds et s'i v'nat bin, i gn'ârèt yink pou l' Noyé, yink pou Pâkes et l'dêrin pou la Pan'cousse.

Là l' Djan vōy avu les couchêts.

T'à routant su in fâ-tch'min, i rasconture èn' oume ki lî dit coume ça :

- Coubin k'tu vinds tes couchêts, eh ? Dju l'z'achtros.

- I n' sont nin à vinde, ki dit l' Djan, ki n'ére nin pus malin k'i n'falot. Nosse mère m'è dit d'aler les wårder dins les steules, et ku s'is v'nint bin, k'i gn'ârot yink pou l' Noyé, l'ôte pou Pôkes et l'ôte pour la Pan'cousse.

- Mês, ça tume bin, dit-i l'oume, Noyé, c'est mi.

- Eh bin !, purdèz vosse bièsse, dit-i l'Djan.

Et l'oume è n'n'alé avu l'pus gros des couchêts.

In pö pus lon, su l'tchumin, i wèt co ène ôte anivêre , ki lî dit insi:

- Coubin les couchêts ?

Lu fô Djan ruspond:

- I n' sont nin à vinde, on m'è dit à l'mājōn k'i gn'avot yink pou Pôkes et l'ôte pou la Pan'cousse.

- Ah bin !, ça tume bin, k'i dit l'oume, dj'ê arivé à timps, c'èst mi k'on loume Pôkes.

La-d'sus, l'Djan lî è d'né l'dejime couchèt, pîs il è continuwé sa route, tins k'lôte filot vit'mint avu l'pourçê.

Coume in fêt-èsprès, ou d'bout d'in moumint, vlà ène grande fame ki s'amon.ne dulé l' Djan, à lî djant .

- Coubin l'couchèt ?

- I n'è nin à vinde, hô !, on l'ôde pou la Pan'cousse.
- Ah ! mon Dieu toudis, dj'arive jusse, c'èst mi la Pan'cousse.
- Purdèz vosse couchèt d'abôrd, èt alèz r'z'a avu.

La fame est don adjamblé la haye avu l' couchèt pou n'nin k'on la wèje èt ile è filé.

Et nosse Djan è ruv'nu à l'måjon sins couchèts. Sa mère lí è d'mandé:

- Et les couchèts, usse k'i sont ? C'est k'tu n' n'ès fwêt ?
- Man, d'avant d'pårtu às tchamps, vous m'ôz dit : I gn'è in couchèt pou l' No.yé, yink pou Pôkes èt l'dêrin, c'èst pou la Pan'cousse. Dj'ê rascontré ces djins- s'lu tch'min, i s'ont d'né à couniche, dju l'z'î ê d'né tchèkin l'leur et i sont r'vôys avu.

La mère è foutu ène boune roufe à s'bènê d'valèt, ki l'è ramassé pou z'awè trop bin choûté sa mère.

L'histwâre è fwêt l'tour du viadje èt on z'a ri co anute.

Gaston LUCY

Raponti.yî pa Louwis Bêdjot, lu 18 du Julièt 1996.